



Gloppen kommune

Stab og støtte

Vår ref
22/14676

Dato
16.02.2023

Gloppen kommune som eigar 2022

Vedteken i kommunestyret i sak 0xx/23.

Adresse
Grandavegen 9, 6823 Sandane

Telefon
57 88 38 00

Org.nr
964 969 124

E-post
post@gloppen.kommune.no

Internett
www.gloppen.kommune.no

Innhold

Handsaming i kommunestyret 23.03.2023:	4
Del I – Generell del og eigarstrategi	5
1.1 Innleiing	5
1.2 Bakgrunn for eigarmeldinga	5
1.2.1 Vedteken eigarskapsstrategi for Gloppen kommune	5
1.2.2 Tilrådingar frå Kommunenes Sentralforbund (KS)	6
1.2.3 Kjenneteikn ved dei ulike former for selskap	6
1.3 Omfanget av kommunalt eigarskap i Gloppen kommune per 31.12.2022	11
1.4 Eigarskapspolitikk og eigarskapsstrategi	12
1.4.1 Viktige vurderingar ved val av selskapsform	12
1.4.2 Kommunen sine ulike roller	12
1.4.3 Kort om status i Gloppen	13
1.4.4 Utdøringar ved eigarstyring	13
1.5 Eigarskapspolitikk	14
1.5.1 Val av selskapsform	14
1.5.2 Føremål med kommunen sin eigarskap i selskap	14
1.5.3 Selskapsstrategi og selskapsavtale/vedtekter	14
1.5.4 Utbytte	15
1.5.5 Samfunnsansvar og etikk	15
1.5.6 Valkomite for styreutnemning i selskap	15
1.5.7 Styret – ansvar, habilitet og lojalitet	15
1.5.8 Gjennomføring av eigarmøte	16
1.5.9 Kommunedirektøren si rolle i kommunale føretak	16
1.6 Eigarskapsstrategi	16
1.6.1 Val av utsending til generalforsamling og val av styre	16
1.6.2 Obligatorisk opplæring av og informasjon til folkevalde	17
1.6.3 Registrering av styreverv	17
1.6.4 Styrehonorar og leiarlønn	17
1.6.5 Habilitetsvurdering av styrerepresentantar	18
1.6.6 Tilsyn og kontroll	18
1.6.7 Beredskapsplanar - Risiko og sårbarheitsanalyse	19
1.6.8 Klimabudsjett	19
1.6.9 Egedomsstrategi	19
DEL II – Omtale av kvart selskap	20
2.1 Aksjeselskap	20
2.1.1 Sogn og Fjordane Energi AS (SFE A/S)	20
2.1.2 Gloppen Energi AS	21
2.1.3 Sogn og Fjordane Holding AS (SFH A/S)	22
2.1.4 Firda Billag AS	23
2.1.5 Breimsbygda skisenter AS	24
2.1.6 Movia Holding AS	25
2.1.7 Visit Nordfjord AS	26
2.1.8 Nordfjordbrua AS	27
2.1.9 Midtvegen 615 AS	28
2.1.10 Voldsfjordkryssing AS	29
2.1.11 Enivest AS	30
2.1.12 Eggenibberåsa AS	31
2.1.13 Kommunal Landspensjonskasse (KLP)	32
2.2 Heileigde kommunale aksjeselskap	33
2.3 Kommunale føretak	33
2.4 Samvirkeføretak	34
2.4.1 Biblioteksentralen SA	34
2.4.2 Trivselsskogen SA	35
2.5. Interkommunale selskap (IKS)	36
2.5.1 Nordfjord Miljøverk IKS (NoMil IKS)	36
2.5.2 Alarmsentralen IKS	37
2.5.3 Nordfjord Havn IKS	38
2.5.4 Theigedom IKS	39
2.6. Kommunale OppgåveFelleskap (KOF)	40

2.6.1 Vestland revisjon kommunale oppgåvefellesskap	40
2.6.2 IKT Nordfjord kommunale oppgåvefellesskap.....	40
2.6.3 Kommunearkivordninga i Vestland kommunalt oppgåvefellesskap	41
2.6.4 SEKOM sekretariat kommunalt oppgåvefellesskap	41
2.7 Interkommunalt Politisk Råd	42
2.7.1 Fjordane interkommunalt politisk råd.....	42
2.8 Stiftingar.....	42
2.8.1 Gloppen frivilligsentral	42
2.8.2 Stiftinga Karnilstunet	42
2.8.3 Stiftinga Musea i Sogn og Fjordane.....	42
2.8.4 Stiftinga Norsk Countrytreff	43
2.8.5 Stiftinga Norsk Fjordhestgard	43
2.8.6 Fjellstad stiftelse.....	44
2.9 Andre samarbeidsorgan/medlemsorganisasjonar Gloppen kommune har interesser i	44
2.9.1 Nordfjordsrådet.....	44
2.9.2 Fjordane folkehøgskule.....	44
2.10 Fallrettar	45
2.10.1 Myklebustdalselva.....	45
2.10.2 Flølofossen	45

HANDSAMING I KOMMUNESTYRET 23.03.2023:

KOM- 0xx/22 Vedtak:

DEL I – GENERELL DEL OG EIGARSTRATEGI

1.1 INNLEIING

Dette er den sjuande eigarmeldinga som er laga i Gloppen kommune.

Eigarmeldinga vert rullert kvart år.

Del I av eigarmeldinga omhandlar i det vesentlege eigarstrategi der det kjem fram synspunkt og vurderingar av prinsipielle utfordringar, samfunnsansvar og etikk, korleis utøve kommunalt eigarskap samt regelverk knytt til habilitet – folkevalde i ulike rollar.

Del II av meldinga har omtale av kvart av selskapa som kommunen har eigarskap i og ei vurdering av framleis eigarskap. I tillegg er det utarbeidd oversikt over stiftingar der kommunen er medstiftar.

1.2 BAKGRUNN FOR EIGARMELDINGA

1.2.1 Vedteken eigarskapsstrategi for Gloppen kommune

Kommunestyret handsama spørsmål om eigarstrategien for dei selskapa og eigedomane som Gloppen kommune eig eller er medeigar i 19.12.2016, og gjorde slikt vedtak:

«Kommunestyret ber om å få framlagt ei eigarskapsmelding for Gloppen kommune til kommunestyremøtet i april 2017. Eigarskapsmeldinga skal mellom anna innehalde:

- Oversikt over selskap Gloppen kommune har eigarskap i (AS, IKS, KF m.v.) og ei beskriving av desse. Det skal innarbeidast i meldinga kven som etter innspel/val frå kommunen sit i styrande organ i det aktuelle selskapet.*
- Oversikt over eigedomar (bustad og anlegg m.v.)*
- Oversikt over stiftingar der Gloppen kommunar har vore medstiftar, eller har innstillingsrett til styre.*

Eigarskapsmelding skal rullerast årleg på kommunestyremøte i mars/april.»

Kommunestyret vedtok på møtet 11.02.2021 denne eigarskapsstrategien for selskap og eigedommar som Gloppen kommune eig eller er medeigar i:

Gloppen kommune skal utøve ein aktiv eigarskap gjennom å formulere klare forventingar/krav til selskapa og ved å utøve tilstrekkeleg kontroll. Dette vert gjort gjennom gode rutinar for eigardialog med selskapa gjennom representantane i dei operative eigarorgana, representantskap og generalforsamling, i samsvar med kommunestyret sine vedtak/føringar.

1. Utsendingane til dei operative eigarorgana, representantskap og generalforsamling, skal utøve kommunen sine interesser i selskapa. Denne utøvinga skal reflektere fleirtalet i kommunestyret. Det er likevel slik at styremedlemmer har plikt til å ivareta selskapet sine interesser - også om desse kjem i konflikt med eigaren sine interesser. Det vert etablert ei ordning der utsendingane drøftar eigarpolitikken med kommunestyret når det er nødvendig og minst ein gong i valperioden. Dersom det kjem opp saker som hastar så mykje at dei ikkje kan vente til neste kommunestyremøte, kan dei drøftast med formannskapet. Denne

ordninga gjeld berre dei største selskapa Gloppen kommune er eigar i, jfr kommunedirektøren si utgreiing.

2. Medlemmar av kommunestyret i Gloppen kommune kan vere medlem i styre eller bedriftsforsamling i selskap der kommunen er eigar. Ved vurdering av om representantane er ugilde til å drøfte saker som vedkjem selskapet i kommunestyret, skal forvaltingslova sine reglar om habilitet leggjast til grunn.
3. Gloppen kommune skal vere tilbakehalden til å gå inn som eigar i nye selskap. Dersom dette er aktuelt skal det vurderast opp mot følgjande kriteria:
 - a. Kommunen bør ikkje gå inn i selskap som har reine forretningsmessige mål.
 - b. Engasjement i selskapa bør ha ein samfunnsmessig funksjon.
 - c. Kommunen kan organisere delar av den kommunale/interkommunale aktiviteten som selskap dersom dette er føremålstenleg og i samsvar med aktuelle strategiar.
4. I selskap med næringsdrift bør Gloppen kommune stille krav om utbytte.
5. Gloppen kommune skal eige, forvalte og utvikle kommunen si egedomsmasse slik at eigedomane bidreg til effektiv tenesteproduksjon og god forretningsmessig drift.
6. Eigarskapsmeldinga skal rullerast årleg saman med behandlinga av økonomiplanen i juni.
7. Gloppen kommune skal ha ei positiv haldning til å gå inn i selskap som driv med grøn energiproduksjon.

1.2.2 Tilrådingar frå Kommunenes Sentralforbund (KS)

Kommunenes Sentralforbund (KS) har utarbeidd 21 anbefalingar for aktivt eigarskap:

1. Obligatorisk opplæring av og informasjon til folkevalde
2. Vurdering og val av selskapsform
3. Fysisk skilje mellom monopol og konkurranseverksemd
4. Utarbeiding av eigarskapsmeldingar
5. Utarbeiding og revidering av styringsdokument
6. Eigarmøte
7. Samansetting og funksjon til eigarorganet
8. Gjennomføring av generalforsamlingar og representantskapsmøte
9. Samansettinga av styret
10. Valkomité og styreutnemningar
11. Kjønnsmessig balanse i styra
12. Rutinar for å sikre riktig kompetanse i selskapsstyra
13. Styresamansetting i konsernmodell
14. Oppnemning av vararepresentantar
15. Habilitetsvurderingar
16. Godtgjering av styrevert
17. Registrering av styrevert
18. Arbeidsgjevartilhøyrigheit i sjølvstendige rettssubjekt
19. Utarbeiding av etiske retningslinjer
20. Særleg om rådmannen sin rolle i kommunale føretak
21. Utøving av tilsyn og kontroll

1.2.3 Kjenneteikn ved dei ulike former for selskap

1.2.3.1 AKSJESELSKAP

Eit aksjeselskap er eit eige rettssubjekt og vert formelt sett ikkje rekna som ein del av kommunen, korkje organisatorisk, økonomisk eller kompetansemessig.

Aksjeselskap har eigne økonomiske rammer gjennom vedtekne budsjett, og held seg til investeringar og driftsposter utanfor kommunen sitt budsjett. Skulle selskapet ikkje vera økonomisk levedyktig, vil aksjeselskapsforma avgrense kommunen sitt ansvar og økonomisk risiko. Aksjeselskap er selskap med avgrensa ansvar. Aksjonærane sin økonomiske risiko er avgrensa til aksjeinnskott, med tillegg av eventuelle eigarlån til selskapet.

Det øvste organ i eit aksjeselskap er generalforsamlinga. Generalforsamlinga utgjer eigarane og er ansvarleg for at selskapet har eit styre, ein revisor og tilstrekkeleg kapital og akseptable rammer for drift. Generalforsamlinga vedtek normalt vedtektene for selskapet. Kommunestyret bestemmer vedtektene i samband med etablering av selskapet.

Som eigar kan kommunestyret sjølv velje medlemmer til styret i eit aksjeselskap eller gje fullmakt til den eller dei som skal utøve mynde som generalforsamling til å velje styre. Kommunen kan som aksjeeigar ikkje gje direkte pålegg til styret i selskapet utan å gå gjennom generalforsamlinga. Styremedlemmer skal i første rekke ta i vare selskapet sine interesser – og ikkje kommunen sine interesser. Vert det interessekonflikt her kan kommunen oppmode styret om å kalle inn til ekstraordinær generalforsamling, men det er selskapet sjølv som avgjer om det vert slik generalsforsamling. Dei vilkår som ligg i eigarstyring ved utforming av vedtekter bør nyttast – eventuelt ved aksjonæravtale. Slik sett kan eit aksjeselskap indirekte vere styrt politisk.

I aksjeselskap etablert saman med andre kommunar / fylkeskommunar/private aktørar, kan styret utgjere representantar frå alle desse. Indirekte eigarstyring skjer ved at selskapsforma gjev handlefridom til styret og med mynde plassert gjennom eigarane i generalforsamlinga. Det økonomiske ansvaret for kommunen er avgrensa til innskoten aksjekapital. Direkte eigarstyring kan gjerast gjennom utforming av vedtekter og eventuelle aksjonæravtalar slik at det gjev god politisk styring av kommunale kjerneoppgåver /tenester.

1.2.3.2 INTERKOMMUNALT SELSKAP (IKS)

Samarbeid mellom fleire kommunar og eller fylkeskommunar kan organiserast som eit interkommunalt selskap (IKS). Desse selskapa er underlagt IKS-lova. Selskapa er eigne juridisk einingar og rettsleg og økonomisk skilde frå deltakarkommunane, men likevel slik at kvar deltakar heftar uavgrensa for sin del av selskapet sine plikter. Eit slikt selskap kan ikkje gå konkurs. IKS skil seg frå kommunale føretak, kommunale oppgåvefelles og vertskommunesamarbeid etter kommunelova sine §§ 9, 18, 19 og 20.

Ved etablering av IKS skal det liggje føre ein selskapsavtale som skal vedtakast i kommunestyret. Avtalen dannar grunnlaget for etableringa av selskapet og korleis drift, ansvar og praktisk tilrettelegging skal skje. Oppstår det tvil eller usemje om drifta av selskapet, ansvar eller utøving av mynde, er det selskapsavtalen som bind partane.

Selskapsavtalen kan også seie noko om reglar for visse type saker, og korleis mynde eventuelt skal delast mellom styret og representantskapet.

Øvste mynde er representantskapet som er sett saman av minst eitt medlem frå kvar kommune/fylkeskommune valt av kommunestyret/fylkesting. Kommunestyret/fylkestinget kan ha instruksjonsrett overfor sine medlemmar i representantskapet. Representantskapet vel styre i selskapet, og handsamar rekneskap, budsjett og økonomiplan samt andre saker som etter lov eller selskapsavtale skal handsamast i representantskapet. Representantskapet kan gjere om vedtak gjort i styret.

Lova sine reglar medfører at deltakarkommunane har større påverknad over styringa av IKS-selskap enn det aksjelova gjev deltakarane eller eigarane i eit aksjeselskap. Denne selskapsforma er mest

bruk som selskapsform ved gjennomføring av kommunale tenester som er styrt etter behov og er regelstyrt, og som gjennom samarbeid er meint å gje stordriftsfordeler, større fagmiljø og lettare rekruttering av fagkompetanse.

Selskapsforma vert også mykje nytta der det skal gjennomførast regionale utviklingsoppgåver, prosjekt og anlegg. For å sikre eigarar og selskapet god økonomistyring og føreseielege rammer, må styret ha føringar frå representantskapet.

1.2.3.3 INTERKOMMUNALT POLITISK RÅD

To eller fleire kommunar kan saman opprette eit interkommunalt politisk råd, jf. kommunelova §18. Deltakarane har uavgrensa økonomisk ansvar for sin del av rådet sine forpliktelsar.

Representantskapet er det øvste organet i eit interkommunalt politisk råd. Alle deltakarane i rådet skal vere representert med minst eit medlem i representantskapet. Kvart kommunestyre vel sine eigne medlemmar og minst like mange varamedlemmar. Dersom ikkje noko anna er fastlagt i samarbeidsavtalen, vel representantskapet sjølv leiar og nestleiar.

Når eit interkommunalt politisk råd vert oppretta, skal det inngåast ein skriftleg samarbeidsavtale mellom alle deltakarane i rådet. Dei enkelte kommunestyra i alle deltakarkommunane skal sjølv vedta samarbeidsavtalen og avtaleendringar.

1.2.3.4 KOMMUNALT OPPGÅVEFELLESKAP (KOF)

To eller fleire kommunar kan saman opprette eit kommunalt oppgåvefellesskap for å løyse felles oppgåver, jf. kommunelova §19. Deltakarane har uavgrensa økonomisk ansvar for sin del av oppgåvefellesskapet sine forpliktelsar.

Representantskapet er det øvste organet i eit kommunalt oppgåvefellesskap. Alle deltakarane skal vere representert med minst eit medlem i representantskapet. Kvart kommunestyre vel sine eigne medlemmar og minst like mange varamedlemmar. Dersom ikkje noko anna er fastlagt i samarbeidsavtalen, vel representantskapet sjølv leiar og nestleiar. Dagleg leiar i oppgåvefellesskapet kan ikkje vere medlem av representantskapet.

Når eit kommunalt oppgåvefellesskap vert oppretta, skal det inngåast ein skriftleg samarbeidsavtale mellom alle deltakarane. Dei enkelte kommunestyra i alle deltakarkommunane skal sjølv vedta samarbeidsavtalen og avtaleendringar.

1.2.3.5 VERTSKOMMUNESAMARBEID

Interkommunalt samarbeid kan også organiserast etter vertskommunemodellen (§20). Her overlet kommunen utføringa av lovpålagte oppgåver og delegerer mynde til å treffe enkeltvedtak til ein vertskommune så langt annan lovgjeving ikkje hindrar slikt samarbeid. Det vil seie at ein kommune har driftsansvaret og budsjettansvaret mot at dei deltakande kommunane refunderer kostnader etter vedteke samarbeidsmodell. Lova skil mellom administrative vertskommunesamarbeid (§ 20-2) og vertskommunesamarbeid med felles, folkevald nemnd (§ 20-3).

Når eit vertskommunesamarbeid vert oppretta, skal det inngåast ein skrifteleg samarbeidsavtale mellom deltakarane i vertskommunesamarbeidet. Dei enkelte kommunestyra i alle deltakarkommunane skal sjølv vedta samarbeidsavtalen og endringar i denne.

1.2.3.5.1 Administrativt vertskommunesamarbeid

Ein kommune kan gjere avtale med ein annan kommune (vertskommunen) at vertskommunen skal utføre oppgåver og gjere vedtak i saker som ikkje har prinsipiell betyding. Kommunestyret delegerer

sjølve mynde til å gjere vedtak ved å instruere kommunedirektøren i eigen kommune om å delegere mynde til kommunedirektøren i vertskommunen.

Dersom vertskommunen gjer vedtak etter delegert mynde frå ein samarbeidskommune, kan samarbeidskommunen omgjere vedtaket etter reglane i forvaltningsloven § 35 første ledd.

1.2.3.5.2 Vertskommunesamarbeid med felles, folkevald nemnd

Kommunar som deltek i eit vertskommunesamarbeid, kan avtale å opprette ei felles, folkevald nemnd i vertskommunen.

Deltakarane kan gje nemnda mynde til å treffe vedtak i alle typer saker dersom ikkje andre lover hindrar dette. Det skal skje ved at kommunestyra sjølv delegerer den samme mynde til nemnda. Nemnda kan gje kommunedirektøren i vertskommunen mynde til å treffe vedtak i saker som ikkje har prinsipiell betydning.

Kvar av deltakarane i samarbeidet skal vere representert med to eller fleire medlemmar i nemnda. Nemnda vel sjølv leiar og nestleiar blant sine medlemmar. I samarbeidsavtalen kan det fastsettast at verva som leiar og nestleiar skal gå på omgang mellom deltakarane.

1.2.3.6 KOMMUNALE FØRETAK (KF)

Føretaket er ein del av kommunen si verksemd, både juridisk og økonomisk. KF er styrt av kommunelova sin § 9. Kommunestyret er selskapet sitt øvste organ. Kommunestyret kan stifte og løyse opp føretak og dei vel styre. Den daglege leiinga i eit KF vert formelt utført av eit styre med delegert mynde og ein operativ dagleg leiar.

KF må halde seg til rammer vedteke av kommunestyret og det kommunale budsjett og handlingsprogram på lik linje med andre kommunale einingar.

Kommunedirektøren har ikkje instruksjonsmynde overfor dagleg leiar, eller mynde til å gjere om vedtak eller tiltak gjort av dagleg leiar. Kommunedirektøren kan, etter kommunelova sin § 9 nr 16, instruere dagleg leiar om at iverksettinga av ei sak skal utsetjast til kommunestyret har behandla saka.

Organisering av KF vert ofte brukt som organisasjonsmodell for drift av vassverk, kommunal bygningsmasse, kulturhus og vaktmeistertjenester. Dei ulike einingane i kommunen tingar tenester av det kommunale føretaket etter behov.

1.2.3.7 SAMVIRKEFØRETAK

Eit samvirkeføretak er ei samanslutning med hovudføremål å fremje medlemmane sine økonomiske interesser ved at desse deltar i føretaket si verksemd enten som forbrukarar, leverandørar eller på liknande måte. Med unnatak av ei normal forrenting av eventuell innskoten kapital, blir avkastinga stort sett verande i verksemda eller fordelt mellom medlemmane på bakgrunn av deira omsetnad i føretaket. Ingen av medlemmane har personleg ansvar for føretaket sine forpliktingar.


Samvirkeføretak er kanskje særlig aktuell der bruken og nytten av samvirkeføretaket er viktigare enn avkastinga på innskoten kapital. Medlemmane deltar aktivt i verksemda enten som forbrukar eller leverandør. Normalt sett er tilgangen til å ta ut overskot avgrensa av medlemmane sin samhandling med selskapet.

Samvirkeoven stiller krav til kva stiftelsesdokumentet og vedtektene minst skal innehalde. Eit samvirkeføretak må alltid stiftast av minst to personar og skal alltid ha minst to medlemmar. Både

fysiske og juridiske personar kan vere stiftarar. (Kjelde: altinn).

1.2.3.8 STIFTINGAR

Stiftingar er regulert gjennom lov om stiftingar av 15.06.2001. Ei stifting skil seg frå andre selskapsformer ved at den ikkje har eigarar eller deltakarar. Stifting er sjølveigande. Når stifting er etablert, har ikkje stiftarane lenger rådvelde over formueverdi som er overført til stiftinga. Stiftinga har ikkje eigarorgan, men kan etter lova ha andre styringsorgan som til dømes ein representativ stiftingsforsamling.



Figur 1 Ulike former for organisering

Figuren over viser ulike måtar å organisere den kommunale drifta på. Dei ulike alternativa er regulert av høvesvis kommunelova, lov om IKS, aksjelova og stiftelseslova. Om figuren vert lesen frå venstre mot høgre viser det at desse formane for organisering heng saman med konkurransesituasjonen for dei tenestene som vert levert. Figuren viser også styringsstrukturen og kommunen sitt ansvar i dei ulike organiseringsformene.

1.3 OMFANGET AV KOMMUNALT EIGARSKAP I GLOPPEN KOMMUNE PER 31.12.2022

Namn på selskap	Bokført verdi	Eigardel
<i>Aksjeselskap</i>		
Sogn og Fjordane Energi as	72 989 030	3,46 %
Gloppen Energi as	48 910 862	70,00 %
Sogn og Fjordane Holding as	150 092	3,90 %
Nordfjordbrua as	1 976 000	33,2 %
Firda Billag as	1 017 000	10,17 %
Breimsbygda skisenter as	550 000	26,14 %
Movia Holding as	375 000	71,52 %
Visit Nordfjord as	130 776	13,14 %
Midtvegen 615 as	70 000	16,67 %
Voldsfjordkryssing as	50 000	5,15 %
Eninvest as	50 000	0,17 %
Byrkjelo kraft as	-	-
Eggenibberåsa as	30 000	
KLP egenkapitalinnskott	20 138 275	
<i>Interkommunale selskap (IKS)</i>		
Nordfjord Miljøverk (Nomil)	1 000	17,3 %
Alarmsentralen Sogn og Fjordane IKS	1 000	5,53 %
Nordfjord Havn IKS	1 000	13,0 %
Trivselshagen IKS	47 344 785	50,0 %
<i>Samvirkeføretak (SA)</i>		
Biblioteksentralen SA	1	
Trivselsskogen SA	250 000	
<i>Stiftingar</i>		
Gloppen frivilligsentral	25 000	
Stiftinga Karnilstunet		
Stiftinga Musea i Sogn og Fjordane		
Stiftinga Norsk Countrytreff		
Stiftinga Norsk Fjordhestgard		
Fjellstad stiftelse		
<i>Interessefellesskap</i>		
Interesseselskapet Rv 52 / Rv 5	10 000	

1.4 EIGARSKAPSPOLITIKK OG EIGARSKAPSSTRATEGI

Eigarskapspolitikk er dei overordna føringane som kommunen legg til grunn for forvaltinga av selskapa og eigardelane. Det gjeld dei system, retningslinjer og rutinar kommunen har for å praktisere eigarskapen. Det omfattar vurderingar som vert gjort før val av selskapsorganisering, rutinar for rapportering, premissar for val av medlemmer til styrande organ osb. Eigarskapspolitikk er det praktiske rammeverk for kommunen si styring.

Eigarstrategi er dei føringar kommunen legg til grunn for dei ulike selskapa for å sikre at selskapa fyl dei målsettingar som eigarane har bestemt. Det vert gjort gjennom fastsetting av vedtekter og føremål samt å gje rammevilkår som er styrande for kvalitet og utvikling av selskapa.

1.4.1 Viktige vurderingar ved val av selskapsform

Det er ulike grunnar til at kommunen etablerer selskap åleine eller saman med andre. I utgangspunktet er spørsmålet om selskapet skal drive med forretningsmessig drift i ein konkurranseutsett marknad. Eit anna spørsmål er om etableringa er meir politisk og strategisk grunna i samarbeid med nabokommunar i regionen og / eller for å auke breidda i eit kompetanse- og fagmiljø.

Kommunen står fritt til å velje selskapsform så lenge lov og forskrifter ikkje set avgrensingar. Følgjande tilhøve bør vurderast før avgjerd om selskapsform vert teken:

Styring:

- Trong for politisk styring
- Tilhøvet mellom kommunen si rolle som eigar og eventuell utøvar av mynde
- Kompetanse og vilkår for kommunen til å følgje opp eigaransvaret – aktiv oppfølging
- Vilkår og avgrensing med omsyn til delegasjon av mynde
- Fleksibilitet – endring av eigartilhøve / samarbeid med private
- Arbeidsgjevarpolitisk strategi
- Etikk og samfunnsansvar

Økonomi:

- Økonomisk ansvar; kva plikter er det kommunen bind seg for
- Økonomisk fridom for selskapet, krav og eigarstyring sett opp mot det å halda på eiga avgjerdsmunde om prioritering av ressursar
- Skatte- og avgiftsmessige tilhøve
- Reglar for offentleg innkjøp

Konkurransesituasjon:

- Risikovurderingar i høve til marknaden, miljø, kvalitet og kvantitet av den kommunale tenesta og tilhøvet til brukar / innbyggjar.

Administrative rutinar:

- Rapportering og oversikt – kva rutinar og administrativ oppfølging er naudsynt
- Tilhøve til forvaltningslov og offentleglova.

1.4.2 Kommunen sine ulike roller

Kommunen har ulike roller, til dømes som utøvar av mynde, tenesteleverandør eller som eigar av selskap. Ved vurdering av etablering av selskap må trongen for politisk styring vurderast særskilt.

1.4.3 Kort om status i Gloppen

Dei siste 10 åra har det vore ein aukande vekst i etablering av kommunale selskap på landsbasis. Gloppen kommune var, saman med dei andre Nordfjordkommunane, tidleg ute og etablerte ulike interkommunale samarbeid for å utføre kommunale tenester og oppgåver som betre kunne løysast gjennom samarbeid enn om kvar kommune skulle utføre dette åleine. Desse samarbeida framstår i dag som interkommunale selskap (IKS), vertskommunesamarbeid etter kommunelova §20 og kommunale oppgåvefelleskap (KOF) etter kommunelova §19. Kommunen er også medeigar i ordinære aksjeselskap (AS). Framover kan det bli aktuelt å organisere Nordfjordsrådet som eit interkommunalt politisk råd (IPR) etter kommunelova §18.

Føremålet med eigne selskap kan vere fleire:

- Auke den forretningsmessige kompetansen i verksemdområde og i styringa
- Avgrense den økonomiske resultatorienteringa frå anna kommunal verksemd
- Redusere økonomisk ansvar eller effekt av samarbeid ved å drive verksemd i fellesskap med andre kommunar
- Styrkje kompetansemiljø, rekrutteringsevne osv i fagmiljø som ofte vert små i små og mellomstore kommunar
- Styrkje hovudkontorfunksjonen til selskap som er viktig for kommunen

1.4.4 Utfordringar ved eigarstyring

Kommunen sine styringsorgan, leiarstruktur og kultur for styring er tilpassa vanleg kommunal verksemd og vanlege politiske – administrative system for styring og rutinar. Auka satsing på organisering av selskap og eigarstyring fører til nye utfordringar for kommunen. Det gjeld både på det politiske og administrative nivå.

Organisering i selskap for å løyse kommunale tenester flyttar mynde og fullmakt frå kommunen til selskapa. Det fører også til delvis flytting av makt ved at organisering av kommunale tenester gjennom selskap medfører ei fristilling frå vanleg styringslinje med kommunedirektøren som administrativ leiar. I vanleg organisering av tenester vert styringa realisert i tråd med dei politiske vedtak og føringar som vert gjort kontinuerleg gjennom året. Ansvar for, og gjennomføringa av desse, ligg til kommunedirektøren. Kommunedirektøren har innanfor sitt delegerte mynde, høve til å påverke tenester og tilbod direkte gjennom eiga styring.

Ved organisering i selskap av kommunale tilbod og tenester er det framleis høve for eigar (kommunestyret) å ha innverknad over drift og gjennomføring av dei tenestene selskapa skal levere. Men det er slik at rammene for slik tenesteproduksjon som selskapa skal utføre vert lagt gjennom handlingsprogram på same vis som for dei kommunale einingane. Verkemedel for styring er likevel andre. Det gjeld til dømes fastsetting av føremål og vedtekter, val og skifte av medlemmer til styre, og gjennom disponering av resultat og finansiering av verksemda.

1.5 EIGARSKAPSPOLITIKK

1.5.1 Val av selskapsform

Det er eigar sitt ansvar å sikre ei selskapsform som er tilpassa verksemda sitt formål, eigarstyringsbehov, marknadsmessige forhold og konkurranseregelverket, herunder regelverk om offentlig støtte.

Skal selskapet ta risiko og operere i ein marknad, bør det etablerast eit aksjeselskap. Der selskapet skal yte tenester til eigarane i eigenregi for fleire kommunar kan interkommunale selskap vere ei hensiktsmessige form. Der ein enkeltkommune skal drive ei verksemd i eigenregi, kan kommunalt føretak (KF) vere ei høveleg selskapsform. Stiftingar kan ikkje brukast for verksemd som krev eigarstyring.

KS tilrår at selskap ved utskilling av verksemd til sjølvstendig rettssubjekt søker medlemskap i ein arbeidsgjevarorganisasjon for ivaretaking av tilsette.

1.5.2 Føremål med kommunen sin eigarskap i selskap

Ein eller fleire av dei seks kategoriane nedanfor bør leggst til grunn for utforming av mål og motiv for dei selskapa som kommunen eig eller er medeigar i:

1. Finansielt motivert (sikre at investert kapital oppnår høgast mogeleg avkastning over tid)
2. Politisk motivert (t.d. behalde og vidareutvikle arbeidsplassar, fødselshjelpar ved etablering som ikkje vil kome opp å gå utan kommunal støtte og liknande.)
3. Effektivisering av tenesteproduksjon (t.d. renovasjon)
4. Samfunnsøkonomisk motivert (t.d. sikre god infrastruktur)
5. Regionalpolitisk posisjonering
6. Samfunnsansvar

Sal bør særleg vurderast i tilfelle der formålet med selskapet har blitt endra.

Gloppen kommune skal i framtida vere tilbakehalden med å gå inn som eigar i selskap/stiftingar. Kommunalt eigarskap og rolla som medstiftar skal vurderast opp mot følgjande kriterium:

- Kommunen bør ikkje gå inn i selskap som har reine forretningsmessige mål.
- Engasjement i selskapa bør ha ein samfunnsmessig funksjon
- Kommunen kan organisere deler av den kommunale/interkommunale aktiviteten som selskap dersom dette er føremålstenleg og i samsvar med aktuelle strategiar.

1.5.3 Selskapsstrategi og selskapsavtale/vedtekter

Selskapet si verksemd skal tydeleggjerast i vedtektene/selskapsavtalen. Innanfor ramma av vedtektene/selskapsavtalen bør selskapet ha klare mål og strategiar. Eigarane skal ha et medvite forhold til ein eventuell forventa avkastning. For selskap som opererer innanfor ein marknad skal prinsippa for utbyttepolitikk klargjerast og deretter fremjast for eigarorganet. Langsiktigheit og samfunnsansvar bør leggst til grunn for det kommunale eigarskapet. Føremålet i selskapsavtale/vedtekter bør vurderast med jamne mellomrom for å sjå om det er behov for endringar.

Fastsetting av vedtekter (KF og AS) og selskapsavtalar (IKS, KOF og IPR) er, saman med val av styremedlemmer, kanskje den viktigaste styringsreiskapen kommunen har. Vedtekter for

aksjeselskap vert vedtatt i generalforsamling. Kommunestyret kan før generalforsamlinga gjere vedtak som bind representantane i stemmegivinga i generalforsamlinga.

1.5.4 Utbytte

I selskap med næringsdrift bør kommunen som hovudregel stille krav om utbytte frå dei selskapa kommunen er medeigar i. For tida er det Sogn og Fjordane Energi, Firda Billag, Gloppen Energi og Eninvest som gjev utbytte til kommunen.

1.5.5 Samfunnsansvar og etikk

Kommunale selskap forvaltar fellesskapet sine ressursar. Forvaltninga skal skje på ein måte som samsvarar med befolkninga sin oppfatning om rett og galt. Omdømet til kommunen vil derfor mellom anna vere avhengig av korleis kommunen forvaltar samfunnsansvaret sitt gjennom selskap. Det finst ikkje eit felles fasitsvar på kva samfunnsansvarleg forretningsdrift er. Dette må definerast av det enkelte selskap.

Etikk er ein viktig del av dei vurderingar som skal gjerast. Dei etiske haldningane legg grunnlag for korleis kommunen faktisk utøver samfunnsansvaret. Etiske retningslinjer bør derfor utarbeidast i kvart selskap. Retningslinjene bør diskuterast og eventuelt reviderast årleg.

Gloppen kommune ser det som avgjerande at dei selskap kommunen eig/har eigarinteresser i, har verdiar og haldningar som samsvarar med kommunen sine etiske retningslinjer, og driv etter sunne forretningsprinsipp. Selskapa skal også ha ein aktiv haldning til klimautslepp og leggje kommunen sitt klimarekneskap til grunn.

1.5.6 Valkomité for styreutnemning i selskap

Ved val av styre til selskap organisert etter aksjelova og lov om interkommunale selskap, bør det vedtektsfestast bruk av valkomité. Føremålet er å sikre samansetting av styre med komplementær kompetanse og i tråd med eigarane sitt føremål med selskapet. Representantskapet/ generalforsamlinga vel leiar av valkomiteen. I selskap med fleire eigarkommunar bør valkomiteen setjast saman for å spegle eigardelar. Valkomiteens innstilling bør grunngjevast.

1.5.7 Styret – ansvar, habilitet og lojalitet

Forvaltinga av aksjeselskap og interkommunale selskap ligg til styret. Det er heimla i lovverket. Det betyr at styret har det overordna myndet og ansvaret for forvaltinga av selskapet. Styret skal også føre tilsyn med den daglege leiinga og selskapet si verksemd elles. Generalforsamlinga i aksjeselskap og representantskapet i eit IKS er selskapet sitt øvste organ, men dei deltek ikkje i forvaltinga av selskapet. Dei har rolla som såkalla operative eigarorgan.

Styret er ansvarleg for at selskapet vert forvalta lojalt i samsvar med føremålet med selskapet. Styret skal difor sørge for at selskapet realiserer den visjonen som eigarane hadde ved etableringa av selskapet, og i kva lei selskapet skal styrast. Styret skal vere ein støttespelar for leiinga i selskapet, og det skal samstundes følgje opp, evaluere og kontrollere leiinga. Styret skal sørge for at det som kollegium er kompetent og profesjonelt i utøvinga av oppgåvene sine. Dette inneber at styret greier å skilje rollar og unngå rolleblanding. Dette er særleg viktig i offentleg eigde selskap sidan her er mange ulike interessentar med sine spesielle krav og forventningar.

Rolla som styremedlem er forskjellig frå rolla som folkevald sidan styrevervet er eit frivillig, personleg verv. Eit styremedlem representerer seg sjølv og ikkje eigarane. Ho eller han skal ivareta selskapet

sine interesser til beste for alle eigarane. Det er den enkelte styremedlem sitt ansvar å drive godt styrearbeid, og dette er ikkje ut frå funksjonen som folkevald, men som den personleg ansvarlege personen som styremedlemen er. Ein aktiv eigarskap betyr også at eit styremedlem kan skiftast ut dersom eigaren meiner denne ikkje fremjar eigarane sine interesser på ein god måte.

Det er opp til kvart enkelt eigarorgan (representantskap/generalforsamling) å avgjere kva type kompetanse eit styre skal ha. I utgangspunktet vert det tilrådd å unngå situasjonar der styret sine medlemmar jamleg blir vurdert i forhold til forvaltningslova sine reglar om habilitet. Difor bør kommunen alltid vurdere bruken av leiande politikarar i selskapsstyra. Rådmannen tilrår at styra etablerer faste rutinar for å handtere mogelege habilitetskonfliktar.

1.5.8 Gjennomføring av eigarmøte

Dei formelle eigarmøta er anten generalforsamling eller representantskapsmøte, men det kan også kallast inn til eigarmøte i tillegg til desse.

Styret bør legge til rette for at flest mulig av eigarorganets medlemmar kan delta i generalforsamling/representantskapet, og at dette blir ein møteplass for aksjeeigarane og styret. Dette kan gjerast ved å følgje reglane om innkalling; at saksdokumenta er utførlege nok til å ta stilling til sakene, at eigarane som ikkje kan møte skal kunne stemme ved bruk av fullmakt (gjeld ikkje interkommunale selskap), at styret, revisjon og valkomité er tilstades og rutinar for at eigarorganet vel møteleiing.

1.5.9 Kommunedirektøren si rolle i kommunale føretak

Kommunedirektøren er budsjettansvarleg for kommunen si samla økonomiske verksemd. Dette omfattar også kommunale føretak der kommunedirektøren ikkje har instruksjonsmynde over dagleg leiar sine disposisjonar. Det er viktig at dette vert tema for samhandlingsdrøfting ved oppretting av føretak. Kommunedirektør, stedfortredar eller andre i leiande posisjonar kan ikkje sitje i styret.

1.6 EIGARSKAPSSTRATEGI

1.6.1 Val av utsending til generalforsamling og val av styre

For aksjeselskap og interkommunale selskap tilrår kommunedirektøren at kommunestyret oppnemner politisk leiing som selskapet sine eigarrepresentantar i eigarorganet. Eigarutøvinga skal spegle kommunestyret sitt samla/ fleirtalsvedtak. Det er sentralt at det vert oppretta ein føreseieleg og klar kommunikasjon mellom eigarorgan og kommunestyret i forkant av generalforsamling / representantskapsmøte.

Det er eigar sitt ansvar å sørge for at styret vert samansett og gitt dei nødvendige styringsrammer for å utøve sitt arbeid som eit profesjonelt organ. Eit profesjonelt styre som kollegium består av personar med eigna personlege eigenskapar som utfyller kvarandre kompetansemessig.

Kjønnsrepresentasjon i styra:

I samsvar med lov om IKS er det krav om 40 % kjønnsrepresentasjon i styra. Reglane i aksjelova §20 – 6 om representasjon av begge kjønn i styra gjeld tilsvarande for aksjeselskap der kommunen er majoritetseigar. Kommunedirektøren tilrår at eigarorgan, uavhengig av organisasjonsform, arbeider for balansert kjønnsrepresentasjon i styra for å betre utnytte eksisterande kompetanse i kommunen. Det er viktig å tenkje gjennom at det ikkje er noko krav om berre å nytte folkevalde i styra.

Der ikkje andre er valde av kommunestyret, representerer ordføraren eller den han eller ho gjev fullmakt, Gloppen kommune i generalforsamlingar og representantskap. Det er utsendingane til generalforsamling/representantskap si oppgåve å utøve kommunen sine interesser i samsvar med fleirtalet i kommunestyret. Det bør derfor etablerast ei ordning der utsendingane drøftar slike saker/eigarpolitikken med kommunestyret når det er nødvendig og minst ein gong i valperioden. Hastesaker kan drøftast med formannskapet. Denne ordninga bør som hovudregel berre gjelde dei store selskapa Gloppen kommune er eigar i:

- Sogn og Fjordane Energi
- Gloppen Energi
- Firda Billag
- Nordfjord Miljøverk
- Trivselshagen (Theigedom)

Ofte er tidsfristane korte i slike saker. Orienteringane kan derfor også måtte skje i etterkant av generalforsamlinga/ representantskapet. Orienteringa kan skje ved munnleg orientering eller som ei orienteringssak til kommunestyret.

Lovverket gjev høve for å utpeike anten personlege eller numeriske vara. Der det vert utpeika vara til styre, tilrår kommunedirektøren at ordninga med numerisk vara bør nyttast for å sikre kontinuitet og kompetanse i styret. Tilrådinga om numerisk vara er gitt ut i frå behovet for kontinuitet og kompetanse. Kommunedirektøren tilrår vidare at 1. vara vert invitert til styremøta for på den måten å sikre best muleg kompetanse og kontinuitet.

1.6.2 Obligatorisk opplæring av og informasjon til folkevalde

Gloppen kommune bør som ein del av folkevaldopplæringa gjennomføre obligatoriske kurs og/eller eigarskapsseminar for alle folkevalde i dei ulike forholda knytt til eigarstyring. Den første opplæringa bør gjennomførast i løpet av dei første 6 månadane av valperioden og seinare med oppfølging etter 2 år. Det vert tilrådd at kommunestyret etter gjennomføring av generalforsamling, får førelagt ei oversikt over status for selskapa.

1.6.3 Registrering av styreverv

Alle som tek på seg styreverv for kommunale selskap skal registrere verva på www.styrevervregisteret.no.

1.6.4 Styrehonorar og leiarlønn

Styrehonorar vert bestemt i selskapet sine eigarorgan. Leiarløn vert fastsett av styret. Kommunen som eigar bør ha ein policy for slike saker, som selskapsorgana kan leggje til grunn. Omsynet til selskapet tilseier at honorar og leiarløn bør utformast slik at dei:

- Fremjar måloppnåing i selskapet.
- Framstår som rimeleg i forhold ansvar, arbeidsbyrde og kompetanse.
- Framstår som konkurransedyktig i høve til like posisjonar i tilsvarande selskap.

Godtgjersle bør reflektere styret sitt ansvar, kompetanse, tidsbruk og verksemda sin kompleksitet. Det medfører at selskap som opererer i ein marknad der det er stor risiko, bør storleik på honorar reflektere dette. Styreverv i aksjeselskap og IKS kan i motsetnad til kommunale føretak vurderast i forhold til strafferettsleg og eller økonomisk ansvar og bør godtgjerast særskilt. Spesielt bør styreleiar godtgjerast særskilt i forhold til styremedlemmer. Kommunedirektøren tilrår at selskapa særskilt teiknar styreforsikring for alle styremedlemmene i selskap med avgrensa ansvar. Forsikringa gjeld det

økonomiske ansvaret, ikkje det strafferettslege. Styremedlemmer generelt bør ikkje påta seg særskilte oppgåver for det aktuelle selskapet i tillegg til styrevervet.

Aksjelova gjev generalforsamlinga ansvar for å fastsette godgjeringsa til styremedlemmene. Frå 9. juni 2009 bestemte Kommunal- og moderniseringsdepartementet ei forskrift som gjer det klart at styra i kommunale føretak ikkje kan vere med å fastsette eiga godtgjering. Det er representantskapet som fastset godtgjeringsa til styremedlemmene i eit IKS og kommunestyret som fastset godtgjeringsa til styret i kommunalt eigd selskap.

1.6.5 Habilitetsvurdering av styreprerentantar

Ein kommunestyreprerentant som er styremedlem i ei verksemd (IKS og AS) vil hamne i habilitetskonflikt mellom rolla som eigar og rolla som styremedlem når selskapet er «part» i ei sak, jf. forvaltningslova § 6 første ledd. Inhabilitet gjeld ikkje ved behandling av overordna saker som årsbudsjett, økonomiplan, og kommuneplan fordi ingen er «part».

I tillegg til direkte inhabilitet kan det oppstå avleia inhabilitet etter forvaltningslova § 6 andre ledd når det er «andre særreigne forhold som er eigna til å svekke tilliten til upartiskheit». Her må kvart tilfelle vurderast særskilt. Kommunestyremedlemmar bør avklare habilitetsspørsmål i forkant ved hjelp av ein juridisk vurdering frå rådmannen. For meir informasjon sjå rettleiar om habilitet frå Kommunal- og distriktsdepartementet.

Etter kommunedirektøren sitt syn bør prinsippet om aktivt eigarskap via generalforsamling og representantskap og prinsippa om styremedlemmane sine rettar og plikter, i større grad føre til at Gloppen kommune vel profesjonelle styremedlemmar. Med profesjonelle styremedlemmar meinast her styremedlemmer som har kompetanse som gjer at ein får eit samla styre som på best mogeleg måte kan ivareta selskapet i tråd med eigaren sitt føremål med selskapet.

1.6.6 Tilsyn og kontroll

Kommunestyret har både eit tilsyns- og kontrollansvar for å sikre at kommunen når sine mål, at regelverket etterlevast og at etiske omsyn vert ivareteke. Kontrollen vert utført mellom anna gjennom rekneskapsrevisjon, forvaltningsrevisjon og selskapskontroll. Kontrollansvaret gjeld også når ei verksemd er skilt ut i egne selskap.

Kontrollutvalet skal på vegne av kommunestyret sjå til at det vert ført kontroll med kommunen sine eigarinteresser i selskap. Kontrollutvalet har derfor ei viktig rolle i kommunen si kontroll med selskap. Det er viktig at kontrollutvalet sikrast gode nok rammevilkår slik at dei har moglegheit til å utøve sin funksjon på ein gode måte.

Kontrollutvalet skal minst ein gong kvar valperiode utarbeide ein plan for gjennomføring av selskapskontroll som kommunestyret skal vedta. Det vert rådd til at planen syner kva eigarinteresser og selskap som kan vera aktuelle for kontroll, og i kva grad det er aktuelt å gjennomføre forvaltningsrevisjon. Med utgangspunkt i ein slik plan skal kontrollutvalet gje rapport til kommunestyret om gjennomførte kontrollar og resultata av desse. Kommunale føretak er ein del av kommunen som juridisk person og kjem inn under kontrollutvalet sitt generelle ansvar for å sjå til at kommunen sine rekneskap vert revidert på ein trygg måte, og at det vert utført forvaltningsrevisjon av den kommunale verksemda i samsvar med kommunelova sine retningslinjer.

Ved utøvinga av eigarskap i aksjeselskap og interkommunale selskap skal det særleg leggjast vekt på at kommunen fører kontroll med eigarinteressene, og at representantane i dei

operative eigarorgana utøver kommunen sine eigarinteresser i samsvar med kommunestyret sine vedtak og føresetnader og i samsvar med selskapslovgivinga. Kommunen skal derfor utøve eit aktivt eigarskap gjennom å formulere klare forventningar/krav til selskapa og ved å utøve tilstrekkeleg kontroll. Dette vert gjort gjennom gode rutinar for eigardialog med selskapa.

Kommunedirektøren tilrår at kontrollutvalet i vertskommunen har tilsynsansvar for interkommunale samarbeid / interkommunale selskap (IKS).

1.6.7 Beredskapsplanar - Risiko og sårbarheitsanalyse

Kommunen må sjå til at alle kommunale selskap, både aksjeselskap og føretak, utarbeider eigne beredskapsplanar og risiko og sårbarheitsanalysar. Desse må tilpassast tilsvarande kommunale planar.

1.6.8 Klimabudsjett

Kommunen skal sjå til at alle kommunale selskap, både aksjeselskap og føretak, utarbeider eigne klimabudsjett. Klimabudsjettet skal tilpassast tilsvarande kommunale planar.

1.6.9 Egedomsstrategi

Gloppen kommune er både eigar, forvaltar og brukar av kommunale egedomar.

Egedomsstrategien omfattar å fastlegge føremålet med å eige egedomen, kva for type egedomar det er interessant å eige og kvifor det er interessant. Strategien har også med korleis kommunen skal gå fram ved å skaffe, forvalte, utvikle og selje egedomar. Gloppen kommune sin strategi er: *Gloppen kommune skal eige, forvalte og utvikle kommunen si egedomsmasse slik at egedomane bidreg til effektiv tenesteproduksjon og god forretningsmessig drift.*

I utøvinga av denne strategien skal kommunen ta omsyn til:

- Samfunnsmessige interesser
 - Miljø og berekraft
 - Kutararv
- Brukarinteresser
 - Brukar sine noverande og framtidige behov
 - Samsvar mellom krav og forventningar til lokala, ref tenesten som vert ytt
- Eigarinteresser
 - Tenelege lokale
 - Kostnadseffektivitet
 - Politiske mål

Kommunestyret vedtok 23.03.2022 å ikkje opprette eit kommunalt føretak for å forvalte kommunen sine næringsareal og næringsgedommar.

DEL II – OMTALE AV KVART SELSKAP

2.1 AKSJESELSKAP

Det er ordførar som representerer Gloppen kommune på generalforsamlinga i alle aksjeselskap der kommunen er medeigar.

2.1.1 Sogn og Fjordane Energi AS (SFE A/S)

www.sfe.no

Styreleiar: Sigurd Reksnes

Konsernsjef: Johannes Rauboti

Kommunal representasjon i styret: Ingen.

FØREMÅL

Selskapet sitt føremål er produksjon, omsetting og overføring av elektrisk energi, samt anna verksemd knytt til desse områda. Selskapet kan bygge ut anlegg, drive, kjøpe og selje anlegg og selskap i samband med dette.

Verksemda kan også drivast i samarbeid med eller ved deltaking i andre selskap med tilsvarende formål.

Selskapet kan også engasjere seg i andre forretningsområde og selskap når dette er eigna til å styrke hovudføremålet eller fører til rasjonell utnytting av selskapet sine ressursar.

Selskapet skal drivast på forretningsmessig basis med vekt på langsiktig verdiskaping for eigarane.

EIGARDEL

SFE er fullt ut eigd av det offentlege. Sogn og Fjordane fylkeskommune er største aksjonær med 49,55 % av aksjane. Gloppen kommunen eig frå 2017 3,45 % av aksjane.

KOMMUNALT LÅN ELLER GARANTI

Ingen.

ØKONOMISK UTVIKLING (KONSERN)

(1.000 kr)	2017	2018	2019	2020	2021
Sum driftsinntekter	1 287 229	1 680 652	1 685 388	1 090 364	1 643 771
Resultat etter skatt (+: overskot)	193 363	285 807	433 417	199 948	-64 644
Utbytte totalt	62 681	100 010	119 752	75 058	0
Utbytte til Gloppen kommune	2 167	3 455	4 137	2 593	0

KOMMUNESTYRET SIN STRATEGI: Vidareføre eigarskapen. Gloppen kommune har som mål å auke eigardel sin i SFE as.

Dette er grunngjeve i at eigarskapen oppfyller føremål 1 og 2, ref kapittel 1.5.2.

2.1.2 Gloppen Energi AS

Selskapet har ikkje eiga nettside.

Styreleiar: Per Jarle Myklebust

Dagleg leiar: John Morten Selsvik

Kommunal representasjon i styret: Magni Aa Berge (Sp) og Leidulf Rygg Bogstad (KrF).

FØREMÅL

Selskapet sitt føremål er produksjon av elektrisk energi og tilhøyrande overføring og omsetning på forretningsmessig basis. Selskapet skal eige, drive og utvikle [kraft]anlegg i samband med dette.

EIGARDEL

Gloppen Energi AS er no eigd av Gloppen kommune med 70 % av aksjane og SFE Produksjon AS (som er SFE si produksjonsverksemd) med 30 %. I åra 2013-2016 var selskapet 100 % eigd av Gloppen kommune. Gloppen kommune sine dåverande 3,33 % (av 3,36 %) av eigarskapen i Sogn og Fjordane Energi AS var lagt til Gloppen Energi AS fram til 2016.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	19 499	21 846	20 367	9 846	21 759
Resultat etter skatt (+: overskot)	7 299	8 543	7 834	-1 265	5 430
Utbytte totalt	700	700	700	2 000	2 700
Utbytte til Gloppen kommune	490	490	490	1 400	1 890

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 1, ref kapittel 1.5.2.

Kommunedirektøren rår til at eigarane vurderer risikostyringa i selskapet.

2.1.3 Sogn og Fjordane Holding AS (SFH A/S)

Selskapet har ikkje eiga nettside.

Styreleiar: Jenny Ellaug Følling

Dagleg leiar: Svein Øverland

Kommunal representasjon i styret: Per Jarle Myklebust (Sp)

FØREMÅL

Selskapet eig per 8. oktober 2019 49,56 prosent av aksjane og er største eigar i Sogn og Fjordane Energi AS. Selskapet si verksemd er ved eit langsiktig og stabilt eigarskap å sikre at dei verdiar som ligg i eigarskapen til aksjane i Sogn og Fjordane Energi AS - og sjølv eigarskapen - kan bli verande i Sogn og Fjordane. Føremålet med å eige og utøve aksjonærrettane til aksjane er å styrke Sogn og Fjordane Energi AS som eit viktig sjølvstendig, regionalt og lokalt eigd kraftselskap i Sogn og Fjordane. Selskapet har og som målsetnad å auke selskapet sitt eigarskap i Sogn og Fjordane Energi AS, mellom anna ved kjøp av aksjar og deltaking ved kapitalutviding i Sogn og Fjordane Energi AS. Selskapet kan og gje ansvarleg lån o.a. til Sogn og Fjordane Energi AS for å styrke selskapet sin soliditet og posisjon som eit viktig sjølvstendig og regionalt kraftselskap.

EIGARDEL

Aksjekapitalen er kr 3 834 904, fordelt på 3 834 904 aksjar, kvar pålydande kr. 1, fordelt på to aksjeklassar, A og B. Aksjeklasse A består av 766 980 aksjar a kr 1, til saman kr 766 980. Aksjeklasse B består av 3 067 924 aksjar a kr 1, til saman kr. 3 067 924. Skilnaden mellom aksjeklassane er at aksjeklasse A har 51 % av stemmane på generalforsamlinga. Elles er aksjane jamstilte. Gloppen kommune eig 3,9 % av aksjane.

Selskapet sine aksjonærer er frå 1. januar 2020 Vestland fylkeskommune og kommunane Sunnfjord, Kinn, Sogndal, Stad, Stryn, Gloppen, Årdal, Luster, Høyanger, Bremanger, Askvoll, Fjaler, Vik, Gulen, Lærdal, Aurland, Hyllestad og Solund.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	-272	-825	-2 519	-731	-761
Resultat etter skatt (+: overskot)	36 833	30 589	47 245	58 500	36 444
Utbytte totalt	37 140	75 000	0	58 125	35 013
Utbytte til Gloppen kommune	0	0	0	2 300	1 366

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 1, ref kapittel 1.5.2.

Gjennom aksjonæravtalen kan ikkje aksjane omsetjast før tidlegast 31.12.2029.

2.1.4 Firda Billag AS

www.firda-billag.no

Styreleiar: Håkon Martin Myrvang

Dagleg leiar: Nils Aslak Huus

Kommunal representasjon i representantskapsmøte: Magni Aa Berge (Sp)

Kommunal representasjon i styret: Arnfinn Brekke (KrF)

FØREMÅL

Selskapet sitt føremål er transportverksemd og tenesteyting i samband med person- og godstransport, samt reisebyrå. Selskapet kan i tillegg eige og forvalte fast eigedom. Selskapet kan også eige eller delta i andre selskap som har liknande verksemd.

EIGARDEL

Firda Billag AS er eigd av 13 kommunar i Sogn og Fjordane i lag med Sogn og Fjordane fylkeskommune. Flora er største eigar med 14,47 % av aksjane. Gloppen kommune eig 10,17 % av aksjane.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	302 150	295 895	278 258	262 480	272 353
Resultat etter skatt (+: overskot)	7 770	8 058	5 236	10 284	-1 077
Utbytte totalt	1 500	1 500	0	0	0
Utbytte til Gloppen kommune	153	153	0	0	0

KOMMUNESTYRET SIN GJELDANDE STRATEGI: Vidareføre eigarskapen.

Dette er grunngjeve i at sjølv om eigarskapen isolert sett ikkje oppfyller nokon av føremåla i kapittel 1.5.2, så er Firda Billag eit konsern som driv med mykje meir enn bussdrift. Firda Billag eig mellom anna verdfulle tomter fleire stader i fylket. Bussdelen eig Firda Billag og Norgesbuss med 50 % kvar. Dette reduserer risikoen for økonomisk tap for eigarane, samstundes som det gjer det vanskeleg å få god pris ved sal. Firda Billag har fleire tilsette i Gloppen. Leiinga i Firda Billag ønskjer ikkje å bli selt. Sunnfjord-kommunane har signalisert at dei ikkje vil selje seg ut av selskapet. Kommunestyret konkluderer difor med at kommunen held fram eigarskapen sin i Firda Billag AS.

Kommunedirektøren foreslår i saksframlegget at strategien vert endra til at vi sel aksjane.

2.1.5 Breimsbygda skisenter AS

www.breimsbygdaskisenter.no

Styreleiar: Kjell Paulen

Kontaktperson: Runar Stensaker Kleppe

Kommunal representasjon i styret: Jan Arve Søvde (uavh), med Janne Marie Solheim (Sp) som vara.

FØREMÅL

Eige, drive og vidareutvikle skitrekk på Utvikfjellet og elles verksemd som har naturleg samanheng med dette. Overskot ved drift skal gå til føremålet. Overskot ved eventuell likvidasjon skal gå til idrettsføremål.

EIGARDEL

Breimsbygda skisenter AS er eigd av Gloppen kommune, Breimsbygda II, Stryn kommune, Vikane II, Nordfjord Kjøtt AS og andre aksjonærar (9,22 %). Gloppen kommune er største aksjonær og eig 26,14 % av aksjane.

KOMMUNALT LÅN ELLER GARANTI

Kommunal garanti: 1.885.740 kr per 31.12.2022.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	2 298	872	902	874	1 935
Resultat etter skatt (+: overskot)	470	-475	-410	-200	335
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 6, ref kapittel 1.5.2.

2.1.6 Movia Holding AS

Selskapet vart oppretta 19.11.2021.

Styreleiar: Marit Elisabeth Larssen

Dagleg leiar: Geir Peder Ueland

Kommunal representasjon i styret: Arnfinn Brekke (KrF)

FØREMÅL

Eige aksjar i selskap: som driv praktisk opplæring, produksjon, handel og anna tjenesteytende arbeid ved bruk av arbeidskraft rekruttert blant personar som varig eller mellombels ikkje er i stand til å utføre arbeid i den ordinære arbeidsmarknaden; eller som har aktivitetstilbod til personar med særskilde behov. Selskapet kan og eige aksjar i selskap med liknande formål som beskrive, og dessutan selskap som eig og forvaltar eigedomar som har til hovudformål å dekke behovet for aktiviteten beskrive ovanfor. Selskapet skal ikkje ha erverv til formål. Selskapet skal ikkje dele ut utbytte, erverve eigne aksjar, gjennomføre kapitalnedsetjingar med utdeling til aksjeeigarane, eller på annan måte gjere utdelingar til aksjeeigarane, med unntak av det som framkjem i vedtektene.

EIGARDEL

Movia Holding AS er eigd av Gloppen kommune, Vestland fylkeskommune, Stad kommune, Stryn kommune, Kinn kommune, Volda kommune, NFU Gloppen lokallag, Sparebanken Sogn og Fjordane, Høyanger kommune og Bremanger kommune. Gloppen kommune eig 71,52 % av aksjane.

KOMMUNALT LÅN ELLER GARANTI

Kommunal garanti: 1.883.299 kr per 31.12.2022.

Garantien er gitt til dotterselskapet Movia Eigedom as.

ØKONOMISK UTVIKLING

(1.000 kr)	2021
Sum driftsinntekter	0
Resultat etter skatt (+: overskot)	-14
Utbytte totalt	0
Utbytte til Gloppen kommune	0

KOMMUNESTYRET SIN STRATEGI: Oppretthalde vår eigarskap.

2.1.7 Visit Nordfjord AS

www.visitnordfjord.no

Styreleiar: Sonja Merethe Øvre-Flo

Dagleg leiar: Marita Sylvi Lindvik

Kommunal representasjon i styret: Ingen

FØREMÅL

Utføre felles marknadsaktivitetar og å stimulere til produktutvikling og løyse andre fellesoppgåver for reiselivsnæringa i dei deltakande kommunane. Selskapet kan elles delta i forretningsmessig verksemd relatert til reiseliv.

EIGARDEL

Visit Nordfjord AS er eigd av mange aksjonærar og samla aksjekapital er 1.724.500 kr. Gloppen kommune eig aksjar for 95 256 kr (i tillegg til 36 000 kr i «gamle» Reisemål Stryn og Nordfjord).

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	6 117	5 069	6 622	7 636	7 068
Resultat etter skatt (+: overskot)	-150	-804	600	1 108	291
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 4, ref kapittel 1.5.2.

2.1.8 Nordfjordbrua AS

www.nordfjordbrua.no

Styreleiar: Harald Kjelstad

Kontaktperson: Jan Olav Tryggestad

Kommunal representasjon i styret: Svein-Ottar Sandal (KrF), Beate Dybendal Nordvik (H), Marit Elisabeth Larssen.

FØREMÅL

Arbeide for å bygge ferjefri kryssing av Nordfjorden mellom Anda og Lote.

EIGARDEL

Gloppen kommune eig aksjar for 1.976.000 kr per 31.12.2022.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	440	327	300	300	300
Resultat etter skatt (+: overskot)	-112	-78	24	95	116
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 4 og 5, ref kapittel 1.5.2.

2.1.9 Midtvegen 615 AS

midtvegen615.no

Styreleiar: Olav Klungre

Dagleg leiar: Olav Klungre

Kommunal representasjon i styret: Nickolai Midtbø Willis (Ap), med Karoline Bjerkeset (Sp) som vara.

FØREMÅL

Arbeide for utbygging og standardheving av fylkesveg 615 i Sogn og Fjordane fylke. Selskapet kan samarbeide med andre vegselskap for å delta i ein større samferdslepakke. Selskapet sitt overskot/underskot skal disponerast etter aksjelov og vedtekter. Det skal ikkje betalast utbytte til aksjonærane.

EIGARDEL

Midtvegen 615 AS er eigd av 54 aksjonærar og har ein samla aksjekapital på 480.000 kr. Gloppen kommune eig 16,67 % av aksjane (70 aksjar).

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	0	2	0	220	0
Resultat etter skatt (+: overskot)	-80	-13	-7	-55	-39
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 5, ref kapittel 1.5.2.

2.1.10 Voldsfjordkryssing AS

www.voldsfjordkryssing.no

Styreleiar: Ola Krumsvik

Dagleg leiar: Odd Arne Folkestad

Kommunal representasjon i styret: Ingen

FØREMÅL

Å arbeide for finansiering og tekniske løysingar med mål om å:

a) Erstatte ferja Volda-Folkestad - med brusamband over Voldsfjorden - finansiert primært med ferjeavløysingsmidlar samt bompengar

b) Erstatte ferjesambandet Volda-Lauvstad - med brusamband over Dalsfjorden - finansiert primært med ferjeavløysingsmidlar samt bompengar

c) Vere pådrivar for etablering av tunnel-samband mellom vestsida av Dalsfjorden og Vanylven.

EIGARDEL

Voldsfjordkryssing AS er eigd 137 aksjonærar og samla aksjekapital er 970.000 kr fordelt på 970 aksjar a 1000 kr. Gloppen kommune har 50 aksjar og eig dermed 5,15 % av selskapet. Stiftingsdatoen er 25.02.2016.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	0	969	676	0	341
Resultat etter skatt (+: overskot)	-318	569	282	-305	0
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 4 og 5, ref kapittel 1.5.2.

2.1.11 Enivest AS

www.enivest.no

Styreleiar: Jørn Eirik Hodne

Dagleg leiar: Nandor Helgheim

Kommunal representasjon i styret: Ingen

FØREMÅL

På forretningsmessig basis, å opprette og tilby framtidsretta kommunikasjonsnett og tenester knytt til denne typen nett, her medrekna deltaking i og kjøp/sal av andre selskap med liknande formål. Selskapet kan også engasjere seg i andre forretningsområde og selskap, når dette er eigna til å styrkje hovudforretningsområdet, eller føre til meir rasjonell utnytting av selskapet sine ressursar.

EIGARDEL

Enivest AS er eigd av 10 aksjonærar med BKK AS og Sogn og Fjordane Energi AS som dei to største eigarane (89,63 % til saman). Gloppen kommune eig 31 aksjar a 1000 kr tilsvarande 0,17 % av selskapet. Gloppen kommune er deleigar i Sogn og Fjordane Energi as som er ein av hovudaksjonærane i Enivest. Slik sett har vi reelt sett noko meir innflytelse i Enivest enn 0,17%.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	142 193	158 164	178 055	190 962	210 038
Resultat etter skatt (+: overskot)	14 656	12 474	16 033	19 490	23 743
Utbytte totalt	0	0	0	0	10 000
Utbytte til Gloppen kommune	0	0	0	0	17

KOMMUNESTYRET SIN GJELDANDE STRATEGI: Vidareføre eigarskapen.

Dette er grunngjeve i at eigarskapen oppfyller føremål 1 og 2, ref kapittel 1.5.2.

Kommunedirektøren foreslår i saksframlegget at strategien vert endra til at vi sel aksjane.

2.1.12 Eggenibberåsa AS

<https://www.eggenipa.no/eggenipa>

Styreleiar: Bjarte Heggheim

Kontaktperson: Bjarte Heggheim

Kommunal representasjon i styret: Ingen

FØREMÅL

Å tilrettelegge, utvikle og vedlikehalde turløypenett i Øvredalen, Eggenipaområdet og i nærliggande områder med tanke på utvikling av god folkehelse. Dette skal m.a. gjennomførast ved opparbeiding av turløyper til Eggenipa med etablering av plattformer og trapper, naturmøteplassar og stinettverk med kvile- og møteplassar, samt rydding og skilting, der deler av prosjektet skal tilpassast rørslehemma.

EIGARDEL

Gloppen kommune eig aksjar for 30.000 kr. Denne aksjeposten vart kjøpt i 2019.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2018	2019	2020	2021
Sum driftsinntekter	0	16	6	151
Resultat etter skatt (+: overskot)	0	-22	-31	6
Utbytte totalt	0	0	0	0
Utbytte til Gloppen kommune	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 2 og 5, ref kapittel 1.5.2.

2.1.13 Kommunal Landspensjonskasse (KLP)

www.klp.no

Styreleiar: Tine Sundtoft

Konsernsjef: Sverre Thornes

Kommunal representasjon i styret: Ingen

OM SELSKAPET

Morselskapet Kommunal Landspensjonskasse er eit gjensidig selskap, og har ikkje eigarar i tradisjonell forstand, men selskapsmedleamar. Selskapsmedlemane er alle kundar som har offentleg tenestepensjon i selskapet. KLP sine kundar og selskapsmedleamar er kommunar, fylkeskommunar, helseføretak og sjølvstendige verksemdar som er knytt til offentleg sektor. KLP er største livsforsikringsselskap i Norge.

KLP leverer pensjons- finans- og forsikringstenester. Konsernet har ein forvaltningskapital på 589 milliardar kroner. Omlag 950 tilsette jobbar i KLP-konsernet.

FØREMÅL

KLP skal levere trygge og konkurransedyktige finans- og forsikringstjenester til offentlig sektor og virksomheter med tilknytning til denne og deres ansatte.

KOMMUNALT MEDLEMSKAP

Gloppen kommune har tenestepensjon i KLP. Som medlem i KLP pliktar kommunen å betale eigenkapitalinnskott i den grad det er nødvendig for å gje KLP tilfredsstillande soliditet. I kommunen sitt rekneskap for 2019 står eigenkapitalinnskott i KLP oppført med ein verdi på 16,0 mill kr. Ved ei eventuell utmelding av KLP er det kommunen sin del av selskapet si oppsamla eigenkapitalinnskott som vert utbetalt.

KOMMUNALT LÅN ELLER GARANTI

Ingen.

KOMMUNESTYRET SIN STRATEGI: Vidareføre eigarskapen.

Kommunal Landspensjonskasse er eit gjensidig eigd selskap. Alle som etablerer avtale om offentleg tenestepensjon i KLP skyter inn eit eigenkapitalinnskott. Dette medfører at kommunar, fylkeskommunar, helseføretak og bedrifter med offentleg tenestepensjon i KLP også er eigarar av selskapet.

2.2 HEILEIGDE KOMMUNALE AKSJESELSKAP

Gloppen kommune har ved årsskiftet 2022/2023 ingen heileigde kommunale aksjeselskap.

2.3 KOMMUNALE FØRETAK

Gloppen kommune har ved årsskiftet 2022/2023 ingen kommunale føretak.

2.4 SAMVIRKEFØRETAK

2.4.1 Biblioteksentralen SA

www.biblioteksentralen.no

Styreleiar: Torger Ødegaard

Dagleg leiar: Hans Anders Vigen

Kommunal representasjon i styret: Ingen

FØREMÅL

Være et serviceorgan for alle typer offentlige biblioteker. Biblioteksentralen har til oppgave å være hovedleverandør av produkter og tjenester til biblioteker og lignende institusjoner. I tillegg kan Biblioteksentralen delta i/etablere virksomhet med det formål å betjene det totale bok-, informasjon- og kunnskapsmarkedet. Biblioteksentralen skal drives etter vanlige bedriftsøkonomiske prinsipper, slik at det skapes økonomisk trygghet og utviklingsmuligheter og slik at andelseiernes interesser ivaretas på beste måte.

EIGARDEL

Kommunane har minst 1 andel for kvar 1200 innbyggjarar. Kvar andel er på 300 kr. Gloppen kommune har 5 andelar.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	131 980	125 324	137 403	153 769	162 589
Resultat etter skatt (+: overskot)	58 822	-7 127	-5 592	4 686	-2 712
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 4, ref kapittel 1.5.2.

2.4.2 Trivselsskogen SA

www.trivselsskogen.no

Styreleiar: Christine Aagård Midthjell

Kontaktperson: Knut Roger Nesdal

Kommunal representasjon i styret: Ingen

FØREMÅL

Tilrettelegge, utvikle og vedlikehalde sentrumsnært turområde med tanke på betre folkehelse. Dette skal m.a. gjennomførast ved opparbeiding av turløyper til Utsikten og Fossen med etablering av plattformer og trapper, klatre og buldrevegg, naturmøteplassar og stinettverk med kvile- og møteplassar samt rydding, skilting og lyssetting. Deler av prosjektet skal tilpassast rørslehemma.

EIGARDEL

Gloppen kommune eig aksjar for 250.000 kr. Denne aksjeposten vart kjøpt i 2019.

KOMMUNALT LÅN ELLER GARANTI

Ingen.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	2 150				
Resultat etter skatt (+: overskot)	-223				
Utbytte totalt	0				
Utbytte til Gloppen kommune	0				

KOMMUNESTYRET SIN STRATEGI: Vidareføre eigarskapen.

Dette er grunngeve i at eigarskapen oppfyller føremål 2 og 5, ref kapittel 1.5.2.

2.5. INTERKOMMUNALE SELSKAP (IKS)

2.5.1 Nordfjord Miljøverk IKS (NoMil IKS)

Styreleiar: Sven Flo

Dagleg leiar: Inge Bent Arnestad

Kommunale utsendingar til representantskapet: Leidulf Gloppestad (Sp), Roar Henden (H) og Sandra Edith Tenud (Ap)

Kommunal representasjon i styret: Gunnvor Sunde (Uavh)

FØREMÅL

Selskapet sitt føremål er å utføre kommunane sine oppgåver innan følgjande deler av avfallsbehandlinga:

1. Oppsamling, innsamling og transport av alle avfallstypar i kommunane
2. Bygging og drift av behandlingsanlegg for restavfall og fraksjonar som kan gjenvinnast
3. Bygging og drift av innsamlingssystem, mottak, gjenvinningsanlegg, mellomlagring og vidaresending av spesialavfall og avfall som kan gjenvinnast. Selskapet kan søkje samarbeid med andre kommunar, regionar og selskap der dette er naturleg
4. Selskapet sine hovudoppgåver gjeld det forbruksavfallet kommunane har ansvaret for, men selskapet kan også drive innsamling, transport og behandling av produksjonsavfall og slam

Selskapet kan ta på seg alle oppgåver som høyrer naturleg saman med dei oppgåvene som er nemnde i pkt. 1-4. Selskapet kan overta ansvaret for dei nemnde funksjonane gradvis etter nærare avtale med kommunane. Selskapet avgjer i kva grad drifta skal skje ved bruk av eigne anlegg, utstyr og mannskap, eller ved leigeavtarar med medlemskommunane eller private næringsdrivande.

EIGARDEL

NoMil IKS har ein interessekapital på 1.000 mill kr fordelt på kommunane Bremanger, Stad, Gloppen, Stryn og Kinn. Gloppen kommune sin del av interessekapitalen er 13,44 %.

Representantskapet med personlege varamenn vert vald av kommunestyra for 4 år i samsvar med den kommunale valperioden.

KOMMUNALT LÅN ELLER GARANTI

Kommunal garanti: 5.701.301 kr per 31.12.2022.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	52 278	60 731	64 838	81 981	89 073
Resultat etter skatt (+: overskot)	-2 042	1 821	408	-333	4 901
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 2 og 3, ref kapittel 1.5.2.

2.5.2 Alarmsentralen IKS

www.alarmsentralen.com

Styreleiar: Øyvind Bang-Olsen

Dagleg leiar: Terje Brandsøy

Kommunal representasjon i representantskapet: Per Jarle Myklebust (Sp)

FØREMÅL

Alarmsentralen sitt føremål er å vere eit respons-, tryggleiks-, og kompetansesenter for deltakarkommunane. Selskapet skal sikre gode tenester for innbyggjarane i kommunane prega av kvalitet, tryggleik, kunnskapsbasert og einskapleg behandling, tilgjengelegheit, service og god brukaropplevd kvalitet.

EIGARDEL

Alarmsentralen Sogn og Fjordane IKS har ein interessekapital fordelt på 24 av kommunane i Sogn og Fjordane (alle utanom Solund og Gulen). Gloppen kommune sin del av interessekapitalen er 5,42 %.

Representantskapet med personlege varamenn vert vald av kommunestyra for 4 år i samsvar med den kommunale valperioden.

KOMMUNALT LÅN ELLER GARANTI

Kommunal garanti: 60.036 kr per 31.12.2022.

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 3, ref kapittel 1.5.2.

2.5.3 Nordfjord Havn IKS

www.nordfjordhavn.no

Styreleiar: Kristian Skibenes

Dagleg leiar: Kjell Magnar Fagna

Kommunal representasjon i rådet: Leidulf Gloppstad (Sp)

Kommunal representasjon i styret: Solveig Lien Gusdal (Sp)

FØREMÅL

Nordfjord Havn IKS er opprettet for å samordne og ivareta den kommunale havnevirksomheten innen samarbeidsområdet. Nordfjord Havn IKS skal saman med andre havneinteresser bidra til et samlet, kostnadseffektivt og konkurransedyktig havnetilbud i regionen.

Nordfjord Havn IKS skal ivareta de administrative og forvaltningsmessige oppgaver som etter havne- og farvannsloven og annen lovgivning som gjelder havnesektoren, påhviler de samarbeidende kommunene. Havneanlegg og arealer skal disponeres med sikte på en best mulig, samlet ressursutnyttelse.

For å opprettholde og videreutvikle den kommunale havnevirksomheten i samarbeidsområdet, og denne virksomhetens trafikkgrunnlag, kan Nordfjord Havn IKS engasjere seg i havnetilknyttet virksomhet som finnes hensiktsmessig og fordelaktig for de samarbeidende kommunenes havneinteresser, og det næringslivet den kommunale havnevirksomheten tar sikte på å betjene.

EIGARDEL

Nordfjord Havn IKS har ein interessekapital fordelt på kommunane Gloppen, Stryn og Kinn. Kinn kommune er største eigar med 48 % eigardel. Gloppen kommune sin del av interessekapitalen er 13 %.

Representantskapet med personlege varamenn vert vald av kommunestyra for 4 år i samsvar med den kommunale valperioden.

KOMMUNALT LÅN ELLER GARANTI

Kommunal garanti: 14.299.909 kr per 31.12.2022.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	24 078	29 824	30 963	22 392	20 355
Resultat etter skatt (+: overskot)	3 953	8 554	9 537	4 496	3 082
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngeve i at eigarskapen oppfyller føremål 3, ref kapittel 1.5.2.

2.5.4 Theigedom IKS

Har ikkje eiga heimeside.

Styreleiar: Trond Ueland

Dagleg leiar: Baard Helle Bolstad

Kommunal representasjon i representantskapet: Per Jarle Myklebust (Sp) og Katrine Anita Haugerøy Heggelund (SV)

Kommunal representasjon i styret: Synne Marie Oppheim, Ola Sundt Ravnestad og Trond Ueland

FØREMÅL

Planleggje, byggje, eige og drive eit felles prosjekt for å skaffe Firda vidaregåande skule nødvendig undervisningsareal og å skaffe skulane og lokalsamfunnet i Gloppen kultursal, symjehall, idrettshall m.v. i samsvar med den funksjonsplanen som er vedteken av deltakarane. Fellesprosjektet omfattar både nybygga i funksjonsplanen og rehabiliteringa av Firdahallen.

EIGARDEL

Theigedom IKS har ein interessekapital fordelt på Gloppen kommune og Sogn og Fjordane fylkeskommune. Gloppen kommune sin del av interessekapitalen er 47.344.785 kr.

Representantskapet med personlege varamenn vert vald av kommunestyra for 4 år i samsvar med den kommunale valperioden.

KOMMUNALT LÅN ELLER GARANTI

Kommunal garanti: 29.516.505 kr per 31.12.2022 – tilsvarar 50% av selskapet si lånegjeld.

ØKONOMISK UTVIKLING

(1.000 kr)	2017	2018	2019	2020	2021
Sum driftsinntekter	18 802	19 789	20 084	19 022	19 224
Resultat etter skatt (+: overskot)	2 002	462	1 542	1 812	1 246
Utbytte totalt	0	0	0	0	0
Utbytte til Gloppen kommune	0	0	0	0	0

KOMMUNESTYRET SIN STRATEGI: Vidareføre eigarskapen.

Dette er grunngjeve i at eigarskapen oppfyller føremål 2, 4 og 5, ref kapittel 1.5.2.

2.6. KOMMUNALE OPPGÅVEFELLESSKAP (KOF)

2.6.1 Vestland revisjon kommunale oppgåvefelleskap

Inga heimeside.

Revisjonseininga er stifta med heimel i kommunelova kapitla 19 om Kommunalt oppgåvefelleskap 24 om Revisjon. Vestland Revisjon Kommunale Oppgåvefelleskap er eit eige rettssubjekt. Styret har arbeidsgjevaransvaret.

Styreleiar: Trygve Jacobsen

Dagleg leiar: Asgeir Tveit

Kommunal representasjon: Venke Kollbotn (KrF)

FØREMÅL

Revisjonssamarbeidet har som føremål å utføre revisjon i, og ha tilsyn med, deltakande kommunar, fylkeskommunar, og kommunale/interkommunale føretak etter kommunelova og tilhøyrande forskrifter og regelverk om revisjon.

Deltakar i revisjonssamarbeidet er ikkje ope for andre enn kommunar og fylkeskommunar.

Revisjonssamarbeidet kan ta på seg revisjon av kommunar, kommunale, fylkeskommunale og interkommunale verksemder og føretak, og elles oppgåver/oppdrag som lovverket til eikvar tid ikkje er til hinder for.

Revisjonssamarbeidet skal fremme kommunane sine økonomiske interesser gjennom deira deltaking i samarbeidet, samstundes som samarbeidet er forplikta til å dekke kommunane sine behov for revisjonstenester. Kommunane er forplikta til å kjøpe sine revisjonstenester av samarbeidet.

Revisjonssamarbeidet kan selge tenester til andre så lenge den totale delen av denne omsetnaden er innanfor grensene til gjeldande regler for utvida eigenregi, jf. lov og forskrift om offentlege anskaffingar.

Revisjonssamarbeidet kan ikkje vere eigar eller deltakar i andre verksemder som kan kome i konkurranse med revisjonssamarbeidet sitt føremål.

2.6.2 IKT Nordfjord kommunale oppgåvefelleskap

www.nordfjordnett.no

IKT Nordfjord er det strategisk IKT-samarbeidet i Nordfjord. Deltakarane er kommunane Bremanger, Gloppen, Kinn, Stad og Stryn. Dette er kommunalt oppgåvefelleskap med heimel i kommunelova kapittel 19.

Styreleiar: Tom Joensen

Dagleg leiar: Tor Halvar Botnen

Kommunal representasjon i styret: Anders Skipenes (delegasjon frå Kommunestyret i sak 108/12).

FØREMÅL

Samarbeidet skal ivareta deltakarkommunane sine oppgåver knytt til strategisk utvikling, kostnadseffektiv service og drift av eigarkommunane sin informasjons- og

kommunikasjonsteknologi (IKT).

Samarbeidet skal gjennom målretta bruk av informasjons- og kommunikasjonsteknologi fremje utvikling av tenesteproduksjon, publikumsservice og administrative tenester i deltakarkommunane.

Samarbeidet er regulert av samarbeidsavtalen. Styret får i oppgåve å utarbeide og ta stilling til andre ev. underavtalar og styringsdokument, t.d. tenesteleveranseavtale og strategidokument.

Samarbeidet er delt i to einingar: ei strategieining (IKT strategi) og ei driftseining (Nordfjordnett), under leiing av eit representantskap, eit styre og ein dagleg leiar.

2.6.3 Kommunearkivordninga i Vestland kommunalt oppgåvefellesskap

Kommunearkivordninga i Vestland er oppretta som kommunalt oppgåvefellesskap med heimel i kommunelova kapittel 19. Oppgåvefellesskapet er eige rettssubjekt.

FØREMÅL

Å leggje tilhøva til rette for at arkiva til deltakarane vert handtert, tekne vare på og formidla i samsvar med arkivlova sine føremål og føresegner. Samarbeidet kan yte depottenester for deltakarane sine papirbaserte og elektroniske arkiv, og dessutan tilby deltakarane ordnings- og digitaliseringstenester, og andre nærliggande tenester. Samarbeidet skal sørgje for at arkiva til deltakarane vert gjorde tilgjengelege for offentleg bruk, forskning og andre administrative og kulturelle føremål.

Deltakarkommunane: Askvoll, Aurland, Bremanger, Fjaler, Gloppen, Gulen, Hyllestad, Høyanger, Kinn, Luster, Lærdal, Stad, Sogndal, Solund, Sunnfjord, Stryn, Vik, Årdal og Vestland fylkeskommune.

Styreleiar: Geir Liavåg Strand

Dagleg leiar: Arnt Ola Fidjestøl

Kommunal representasjon i styret: Geir Liavåg Strand

2.6.4 SEKOM sekretariat kommunalt oppgåvefellesskap

www.sekom.no

Sekom-sekretariatet er oppretta som kommunalt oppgåvefellesskap.

Styreleiar: Per Rune Vereide

Dagleg leiar: Arnar Helgheim

Kommunal medlem i representantskapet: Beate Dybendal Nordvik, med Bjarte Gangeskar som vara.

Kommunal representasjon i styret: Per Rune Vereide (Sp)

FØREMÅL

Utføre sekretariatstenester for kontrollutvala i eigarkommunane Askvoll, Bremanger, Fjaler, Gloppen, Gulen, Hyllestad, Solund, Stryn og Sunnfjord.

2.7 INTERKOMMUNALT POLITISK RÅD

2.7.1 Fjordane interkommunalt politisk råd

Gloppen kommune vedtok i kommunestyremøte 27.10.2021 å slutte seg til samarbeidsavtalen om etablering av Fjordane interkommunalt politisk råd frå 1.1.2022. Dei kommunane som er med i rådet frå oppstarten er Solund, Hyllestad, Fjaler, Askvoll, Sunnfjord, Kinn, Bremanger, Stad, Stryn og Gloppen.

2.8 STIFTINGAR

Ei stifting eig seg sjølv. Gloppen kommune er medstiftar i dei stiftingane som er nemnd her, men vi er ikkje eigarar og slik sett høyrer oversikta under strengt tatt ikkje med i ei eigarmelding.

2.8.1 Gloppen frivilligsentral

www.gloppen.frivilligsentral.no

Styreleiar: Anders Ryssdal

Dagleg leiar: Elfrid Rauset Håheim

Kommunal representasjon i styret: Eivind Reed (Sp)

FØREMÅL

Frivillig arbeid i Gloppen innanfor eit kristent/humanitært menneskesyn.

EIGARDEL

Gloppen frivilligsentral har ein stiftingskapital på 52.000 kr. Gloppen kommune har betalt 25.000 kr og kommunen sin del av stiftingskapitalen er dermed 48 %.

Kommunen oppnemner ein styremedlem med vara.

2.8.2 Stiftinga Karnilstunet

Inga nettside, men side på Facebook.

Styreleiar: Karoline Bjerkeset

Kontaktperson: Ove Hauge

Kommunal representasjon i styret: Olaf Sigurd Gundersen (Sp)

FØREMÅL

Overta tun, bygninger m.m. på gnr. 68, bnr. 1 i Gloppen for å sikre bygningar, inventar og kulturlandskap for framtida.

EIGARDEL

Stiftinga Karnilstunet har ein stiftingskapital på 250.000 kr.

Kommunen oppnemner ein styremedlem.

2.8.3 Stiftinga Musea i Sogn og Fjordane

www.sfj.museum.no

Styreleiar: Ivar Kvalen
Dagleg leiar: Jan Heggheim
Kommunal representasjon i rådet: Leidulf Gloppestad (Sp)

FØREMÅL

Drift av museum med offentlege driftstilskot.

EIGARDEL

Stiftinga Musea i Sogn og Fjordane har ein grunnkapital på 100.000 kr. Gloppen kommune har betalt 10.000 kr og kommunen sin del av stiftingskapitalen er dermed 10 %.

Kommunen oppnemner ein medlem til stiftinga sitt råd.

2.8.4 Stiftinga Norsk Countrytreff

www.norskcountrysktreff.no

Styreleiar: Nils R Sandal
Dagleg leiar: Arve Kleppe
Kommunal representasjon på generalforsamlinga: Per Rune Vereide (Sp)
Kommunal representasjon i styret: Bernt Reed (Sp)

FØREMÅL

Å i framtida vere den kvalitetsmessig beste festivalen i Norge, og å kunne tilby dette kulturtilbodet til fastbuande og til besøkande frå inn- og utland

Å arrangere eit årleg countrytreff i Gloppen kommune. Arrangementet har eit overordna mål å presentere nasjonale og internasjonale artistar og grupper på høgt musikalsk nivå, vidare skal arenaen vere open for regionale og lokale etablerte og nye artistar og grupper som på den måten kan få presentere seg i eit større miljø.

Å kunne vere arrangør eller vere medarrangør i andre lokale, regionale og nasjonale countrykonsertar gjennom året, med det som føremål å auke interessa for countrymusikk, og dermed legge grunnlag for auka interesse for den årlege countryfestivalen. Dette må likevel ikkje verte ei økonomisk belastning for stiftinga.

Å oppretthalde og vidareutvikle det gode og attraktive miljøet, og å kunne tilby fleire tilbod for heile familien under den årlege countryfestivalen.

EIGARDEL

Stiftinga Norsk Countrytreff har ein grunnkapital som ligg i dei bygningar/anlegg som stiftinga eig. Utifrå verditaksten (24.03.04) er den tekniske verdien sett til 740.000 kr, og salsverdi på takseringstidspunktet er 410.000 kr.

Kommunen oppnemner ein medlem til representantskapet og ein medlem til styret.

2.8.5 Stiftinga Norsk Fjordhestgard

Inga nettside, men side på Facebook.

Styreleiar: Anne Marie Strand Håheim
Kontaktperson: Gerd Ynnesdal
Kommunal representasjon i rådet: Ingen
Kommunal representasjon i styret: Ingen

FØREMÅL

Bygge opp eit kompetansesenter for avl og bruk av fjordhest og å produsere andre tenester i samband med dette.

EIGARDEL

Stiftinga Norsk Fjordhestgard har ein stiftingskapital.

Kommunen oppnemner ein styremedlem med vara.

2.8.6 Fjellstad stiftelse

Inga nettside.

Styreleiar: Geir Peder Ueland

Kontaktperson: Geir Peder Ueland

Stiftelsen vel sine egne styrerepresentantar.

FØREMÅL

Drift av bustadar for vankelegstilte personar eller andre.

EIGARDEL

Fjellstad stiftelse har ein stiftingskapital på 1920 kr.

Stiftinga utpeiker sitt eige styre.

2.9 ANDRE SAMARBEIDSORGAN/MEDLEMSORGANISASJONAR GLOPPEN KOMMUNE HAR INTERESSER I

2.9.1 Nordfjordrådet

Inga heimeside.

Rådet er oppretta med heimel i den gamle kommunelova sin § 27, nr. 1.

Leiar: Per Kjøllestad (Sp), Stryn kommune

Koordinator og rådgjevar: Elisabeth Hatlenes

Kommunal representasjon: Ordførar Leidulf Gloppestad (Sp)

FØREMÅL

Nordfjordrådet skal vere ein interesseorganisasjon for alle dei deltakande kommunane på alle område og alle plan, og skal dessutan vere eit organ for løysing av fellesspørsmål og oppgåver for dei same kommunane. Rådet sitt mynde i einskildsaker er fastsett i eige delegasjonsreglement.

2.9.2 Fjordane folkehøgskule

www.fjordane.fhs.no

Fjordane folkehøgskule er organisert som ei foreining.

Styreleiar: Øyind Dypveit
Dagleg leiar: Silvia Van Hesik Førde
Kommunal representasjon i styret: Ingen

FØREMÅL

Bygge og drive folkehøgskule i Eid.

EIGARDEL

Fjordane folkehøgskule har ein bokført andelskapital på 1.093.700 kr. Gloppen kommune har 50 andelar a 1000 kr og dermed ein eigardel på 0,5 %. Vi har ikkje stemmerett. Kommunedirektøren tilrår at vi sel desse 50 andelane til Stad kommune.

2.10 FALLRETTAR

2.10.1 Myklebustdalselva

Gloppen kommune er fallrettseigar med 3,9 % i Myklebustdalselva. Fallrettane er leigd ut til Byrkjelo kraft as for 30 år frå konsesjonsdato (17.02.2005).

2.10.2 Flølofossen

Gloppen kommune kjøpte eigedommane Havnen og Fossen av avviklingsstyret i Breim Everk. Handelen er tinglyst 10. november 1978. Gloppen kommune eig alle fallrettane i Flølofossen. Dette utgjer 4,2 % av fallrettane i Storelva.